

Inzko: Domaće institucije moraju podržati vladavinu prava



Nakon završetka međunarodne konferencije o jačanju vladavine prava u Bosni i Hercegovini, visoki predstavnik i posebni predstavnik EU Valentin Inzko sastat će se danas sa ministrom pravde BiH, Barišom Čolakom, i izvijestiti ga o rezultatima ove konferencije.

Visoki predstavnik i posebni predstavnik EU istaknut će da je današnja konferencija dokaz potpore međunarodne zajednice pravosuđu BiH. Inzko će također istaknuti da će međunarodna zajednica učiniti sve što je potrebno kako bi pomogla dodjelu potrebnih sredstava i ljudskih resursa pravosuđu.

Ova konferencija je osmišljena kako bi se fokus ponovno usmjerio na vladavinu prava, jer je ovo jedan od suštinskih elemenata svakog funkcionalnog demokratskog društva i preduvjet za napredovanje Bosne i Hercegovine u euro-atlantskim integracijama.

U svjetlu apsolutne potrebe da vlasti u Bosni i Hercegovini dokažu obvezujuću opredijeljenost koju su iskazali kao potporu vladavini prava, visoki predstavnik i posebni predstavnik EU apelirat će na ministra Čolaka da pomogne daljnjem razvoju pravosuđa, ključnog stupa u svakom društvu koje teži da bude demokratsko, te da provede najbolje primjere iz europske prakse vladavine prava.

«Domaći stručnjaci su ozbiljne i sposobne osobe. Mogu uraditi

sve što i međunarodni stručnjaci. Uspješna vladavina prava ima ključno značenje za budućnost Bosne i Hercegovine i za njezine izgleda za integracijom u Europu», rekao je visoki predstavnik i posebni predstavnik EU. «Sada političari Bosne i Hercegovine trebaju pokazati da su ozbiljni kada je u pitanju vladavina prava tako što će osigurati sve što je neophodno za postojanje jakih i uspješnih pravosudnih institucija na svim razinama».